

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03 i 42/04), Vijeće ministara Bosne i Hercegovine, na 72. sjednici održanoj 16. decembra 2004, donijelo je

## ODLUKU

### O OSNIVANJU KOMISIJE ZA DRŽAVNU IMOVINU, UTVRĐIVANJE I RASPODJELU DRŽAVNE IMOVINE, ODREĐIVANJE PRAVA I OBAVEZA BOSNE I HERCEGOVINE, ENTITETA I BRČKO DISTRIKTA BOSNE I HERCEGOVINE U UPRAVLJANJU DRŽAVNOM IMOVINOM

#### Član 1.

Ovom odlukom se osniva Komisija za državnu imovinu (u daljem tekstu: Komisija) zadužena za izradu kriterija za utvrđivanje državne imovine i njenu raspodjelu između Bosne i Hercegovine, entiteta i Brčko Distrikta Bosne i Hercegovine i za donošenje propisa o upravljanju tom imovinom, te za predlaganje nacrtu zakona o pravima vlasništva i upravljanja državnom imovinom.

Komisija se osniva kao stalno tijelo Vijeća ministara Bosne i Hercegovine i djelovat će do konačnog usvajanja navedenog propisa.

#### Član 2.

Komisija koja se osniva za obavljanje zadataka iz prethodnog stava, pod "državnom imovinom" podrazumijeva slijedeće:

- a) imovinu, koja se sastoji od pokretnih i nepokretnih stvari, novčanih sredstava i potraživanja novčanih sredstava i stvari, koja pripada državi Bosni i Hercegovini (kao međunarodno priznatoj državi) na osnovu međunarodnog Sporazuma o pitanjima sukcesije, koji su 29. juna 2001. god. potpisale države Bosna i Hercegovina, Hrvatska, Bivša Jugoslovenska Republika Makedonija, Slovenija i Savezna Republika Jugoslavija, bez obzira da li se, na dan donošenja ove odluke, smatra vlasništvom ili posjedom, ili je upisana kao imovina bilo kojeg nivoa vlasti ili javne organizacije u Bosni i Hercegovini i bez obzira da li je tom imovinom, u periodu od prestanka postojanja Socijalističke Federativne Republike Jugoslavije, na bilo koji način ili u bilo kojem obliku raspolagalo neko pravno lice ili organ javnog ili privatnog karaktera, ili
- b) imovinu, koja se sastoji od pokretnih i nepokretnih stvari, novčanih sredstava i potraživanja novčanih sredstava i stvari, na koje je pravo raspolaganja i upravljanja imala bivša Socijalistička Republika Bosna i Hercegovina i bilo koji od njenih organa (u daljem tekstu: SR BiH) prije 31. decembra 1991. god, bez obzira da li se ta imovina, na dan donošenja ove odluke, smatra vlasništvom ili posjedom, ili je upisana kao imovina bilo kojeg nivoa vlasti uspostavljenog Ustavom Bosne i Hercegovine ili bilo kojeg drugog nivoa vlasti ili javne organizacije ili organa u Bosni i Hercegovini i bez obzira da li je tom imovinom, u periodu od prestanka postojanja SR BiH, na bilo koji način ili u bilo kojem obliku raspolagalo neko pravno lice ili organ javnog ili privatnog karaktera; ili
- c) svaka druga imovina za koju Komisija utvrdi, nakon što izvrši analizu katastra, zemljišnih knjiga i drugih javnih knjiga, da ulazi u podjelu iz tačke a) stava 1. člana 3. ove odluke.

#### Član 3.

U skladu sa članom 1. ove odluke, Komisija priprema:

- a) kriterije koji će se primjenjivati da bi se utvrdilo koja imovina je u vlasništvu Bosne i Hercegovine, entiteta i Brčko Distrikta;
- b) nacрте zakonskih akata za usvajanje, kojima se osigurava da kriteriji iz tačke a) ovog člana budu provedeni;

- c) prijedloge vezano za upis imovine u javne registre u Bosni i Hercegovini i na teritoriji drugih država bivše SFRJ, odnosno drugih država;
- d) prijedloge kriterija za preuzimanje imovine sa nivoa entiteta i Brčko Distrikta na nivo Bosne i Hercegovine;
- e) prijedloge odgovarajućeg načina naknade, ukoliko je potrebno, koji uključuje analizu finansijskih implikacija predloženih rješenja u pogledu eksproprijacije u navedenim nacrtima zakonskih akata.

#### Član 4.

Komisija izrađuje, po potrebi, smjernice, nacрте zakona i drugih propisa, izmjene i dopune zakona i drugih zakonskih akata koji mogu biti potrebni a donosi ih Parlamentarna skupština Bosne i Hercegovine, zakonodavni organi Federacije Bosne i Hercegovine, Republike Srpske, Brčko Distrikta i kantona, kao i Vijeće ministara Bosne i Hercegovine, Vlada Federacije Bosne i Hercegovine, vlade kantona, Vlada Brčko Distrikta i Vlada Republike Srpske.

#### Član 5.

Komisija se u ostvarivanju svog mandata pridržava slijedećih principa:

- a) principa potpunog provođenja ustavne obaveze o pretvaranju društvene imovine u druge oblike vlasništva;
- b) principa prema kojem svaki nivo vlasti ima imovinu neophodnu ili namijenjenu za ostvarivanje aktivnosti koje provodi svaki nivo vlasti u skladu sa Ustavom Bosne i Hercegovine;
- c) priznatih principa vlasništva na nepokretnoj imovini, kao što su jedinstvo prava vlasništva, jedinstvo nepokretnosti, obaveza Upisa u javne knjige i princip povjerenja u zemljišne knjige.

#### Član 6.

Komisija ima dvanaest (12) članova.

Članovi Komisije predstavljaju:

- a) Kabinet predsjedavajućeg Vijeća ministara BiH;
- b) Pravobranilaštvo Bosne i Hercegovine;
- c) Zajedničku službu institucija Bosne i Hercegovine;
- d) Ministarstvo finansija i trezora Bosne i Hercegovine;
- e) Ministarstvo pravde Bosne i Hercegovine;
- f) Ministarstvo pravde Federacije Bosne i Hercegovine;
- g) Ministarstvo pravde Republike Srpske;
- h) Pravobranilaštvo Federacije Bosne i Hercegovine;

- i) Pravobranilaštvo Republike Srpske;
- j) Ministarstvo finansija Federacije Bosne i Hercegovine;
- k) Ministarstvo finansija Republike Srpske;
- l) Vladu Brčko Distrikta.

Sekretar Komisije je predstavnik Ministarstva pravde Bosne i Hercegovine.

Komisija bira predsjedavajućeg na svojoj konstituirajućoj sjednici.

Svaki od rukovodilaca institucija zastupljenih u Komisiji dužan je osigurati da njegovu instituciju zastupa predstavnik koji ima sva ovlaštenja za zastupanje, uključujući i ovlaštenje da donosi odluke u njeno ime na sjednicama Komisije.

Odluku o imenovanju članova Komisije donosi Vijeće ministara na narednoj sjednici nakon donošenja odluke o osnivanju Komisije.

#### Član 7.

Komisija može imati i stalne posmatrače, uključujući predstavnike Ureda Visokog predstavnika u Bosni i Hercegovini.

Stalni posmatrači imaju pravo učestvovati u svim aspektima rada Komisije, ali bez prava glasa.

#### Član 8.

Predsjedavajući može pozvati stručnjake pravne, ekonomske i druge struke da učestvuju u radu Komisije kao gosti da bi pomogli u ostvarivanju njenog mandata.

#### Član 9.

Predsjedavajući je nadležan za koordiniranje rada Komisije.

Za održavanje sastanaka Komisije potreban je kvorum koji čini prosta većina imenovanih članova.

Komisija može donositi odluke i usvajati prijedloge običnom većinom prisutnih članova s tim da na sastanku mora prisustvovati najmanje po jedan član Komisije sa nivoa svakog entiteta.

Članovi Komisije i osobe koje učestvuju u radu Komisije učestvuju po službenoj dužnosti.

Predsjedavajući može zatražiti od organa vlasti Bosne i Hercegovine i entiteta da daju informacije o operativnim, finansijskim ili upravnim smjericama potrebnim za unapređenje rada Komisije.

Komisija će imati administraciju kao privremeno tijelo koje će sačinjavati odgovarajuće osoblje iz institucija Bosne i Hercegovine koje posjeduje kvalifikacije potrebne za rad Komisije.

#### Član 10.

Komisija je dužna da do 30. maja 2005. godine izradi završni izvještaj o radu za predsjedavajućeg Vijeća ministara i/ili ponudi nacрте odgovarajućih zakonskih akata u istom roku.

U slučaju da Komisija ne postigne konsenzus u pogledu završnog izvještaja iz prethodnog stava ovog člana, predsjedavajući Komisije je dužan da predsjedavajućem Vijeća ministara dostavi izvještaj o svim pitanjima vezanim za rad Komisije.

Član 11.

Ova odluka stupa na snagu danom objavljivanja u "Službenom glasniku BiH".

VM 305/04  
16. decembra 2004. godine  
Sarajevo

Predsjedavajući  
Vijeća ministara BiH  
**Adnan Terzić**, s. r.